



Igls genitours, la sora e la putrada digl premi: Luisa Scarpatetti, Pauli Scarpatetti, Patricia Scarpatetti e Nicole Scarpatetti (da san.).

# «Ple tgi angal ademplia igls criteris»

Premi per Patricia Scarpatetti

DA GION NUTEGN STGIER / ANR

■ An en rom festiv ò Patricia Scarpatetti retschet a Turitg en premi tgi vign surdo siva digl 1998 mintga dus onns a persungas u instituziuns tgi s'angaschan segl camp umanitar. Surdo vign igl premi, «Jonas Furrer Preis», doto cun 10 000 francs dad ena loscha tgi reunescha signours pi bagnstants. La lavour da Patricia Scarpatetti, da Cunter, a favour digls unfants sainza datgesa aint igl martgea da San Pedro Sula an Honduras è exemplarica ed instancabla. Sia veta, sies mond e sies cor èn igls unfants tgi canoschan strousch l'amour da mamma e bab. Gist chella privadientscha e tgira porchascha Patricia Scarpatetti a 42 unfants aint igl asil d'unfants «Yo quiero ser...», a San Pedro Sula, cun en milliun abitants, igl sagond grond martgea an Honduras. Prest diesch onns veiva la donna da 33 onns per chels unfants tgi on adegna puspe vasia alla povradad an fatscha. Graztga agl grond angaschamaint da Patricia Scarpatetti ed a tot las persungas tgi èn adegna puspe sa mussadas fitg generousas è pussebel da porscher a 42 mattas e mats, da 12 meis anfignen 17 onns, en datgesa noua tgi els retschevan betg angal bler'amour, magagn er en li noua tgi els èn schurmageas da criminalitad ed anc bler oter. Dalla missiun seriosa da Patricia Scarpatetti ò er santia la Fundaziun «Jonas Furrer-Preis», tgi surdat siva digl 1998 mintga dus onns en premi a persungas u ad insti-

tuziuns tgi s'angaschan per projects umanitar.

### Betg sto simpel da sa decider

Parsoura dalla Fundaziun «Jonas Furrer-Preis» è Hans Bühler, egn da chels 800 framazungs (Freimaurer) tgi appartigna alla loscha «Modestia cum Libertate». I seia ansomma betg sto schi simpel a tge project dar igl premi 2014 cun aver tot projects inoltros ple tgi angal ademplia igls criteris tgi dovra per retschever igl premi doto cun 10 000 francs. Ena misergia, tgi seia ple tgi angal petra, seia per Patricia Scarpatetti prest mintga de realitad e perchegl ins vegia decida da surdar ad ella igl premi 2014, ò detg Hans Bühler. Da redutgier la misergia cun chel premi seia bagn betg pussebel, dantant duess igl sustign finanziar tuttegna pussibilitar a Patricia Scarpatetti ed a sies 12 collaboratours digl asil d'unfants «Yo quiero ser...», da porscher agls 42 unfants ena migra qualitat da veiver.

### Igl davos pled ò gia igl president d'onour

Tignia la laudatio ò Thomas Borer, igl anteriour ambassadour svizzer a Berlin. El ò detg tgi igl premi vigna surdo a persungas tgi mossan respect e toleranza anvers igl individi, tgi sa mossan solidaricas anvers igls povers e tgi s'angaschan per ena veta an dignitad umana. Tots chels aspects ins dastga er attribueir a Patricia Scarpatetti ed a sies angaschi grondious,

ò menziuno igl anteriour diplomat. Dantant tgi an Svizra ins vigna adegna pi manivel alla adualitad, seia betg previa ainten la societad da Honduras en post per igls unfants dalla veia. Bruno Fellingner, igl president d'onour dalla Fundaziun «Jonas Furrer-Preis», en om da passa 90 onns, è sto schi commuento dalla lavour da Patricia Scarpatetti, tgi el ò gist segl li decida d'augmentar la somma digl premi da 10 000 francs per 5000 francs. Siva tgi Hans Bühler ò surdo igl premi a Patricia Scarpatetti è la societad illustra, cun blera prominenzia politica da Turitg, sa dulzada dallas soptgas per applaudar e chegl per en lung taimp.

### Pleds cordials e simpatics

Ple tgi angal commuentada è alloura er stada la putrada digl premi. Per ella seia en grond privilegi da pudeir spindrar unfants e dar ad els l'amour tgi maretan. Patricia Scarpatetti ò detg tgi pussibilito da realisar chel project vegian fitg bleras persungas generousas, vigl e gioven tgi vegia manega bagn cun ella, instituziuns ed organizaziuns plagn generousadad ed alloura betg igl davos igls sies genitours Luisa e Pauli Scarpatetti, tgi seian stos en grond sustign mental an tots chels onns. Angraztgea ò Patricia Scarpatetti er an nom digls 42 unfants e manega tgi lour fatschas cuntaintas conferman igl pi bagn tots chels sustigns pi pitschens e pi gronds tgi ella vegia gia l'onour da retschever igls davos diesch onns.



Igl president actual ed igl president d'onour digl «Jonas Furrer-Preis»: Hans Bühler e Bruno Fellingner (da san.).



Tignia la laudatio ò nign oter tgi Thomas Borer, igl anteriour ambassadour svizzer a Berlin.



Er tranter igls giasts tar la surdada digl premi era consigliera nazionala Jacqueline Fehr (sagonda da san.).



Gratulaziun d'Astrid Thurner (san.) per Patricia Scarpatetti.



Patricia Scarpatetti flancada digl anteriour cunsigliar nazional Urs Hany e sia mamma Mirjam Hany.

FOTOS G. N. STGIER



Gratulo ò er sia ameia Daniela Steier tgi è er gio stada a Honduras (san.).